

影印
文淵閣

四庫全書

影印

文淵閣四庫全書

第四八五冊

北京出版集團公司
北京出版社

本冊目次

吳郡志 新安志 剡錄

宋 范成大撰……………一

宋 羅願撰……………三三七

宋 高似孫撰……………五二七

欽定四庫全書

史部
吳郡志卷一至六

詳校官監審御史臣沈孫璉

檢討臣德生覆勘

總校官編修臣倉聖脈

校對官助教臣卜維吉

謄錄監生臣陸潮愈

欽定四庫全書

史部十一

吳郡志

地理類三都會郡縣之屬

提要

欽定四庫全書

吳郡志
提要

臣等謹案吳郡志五十卷宋范成大撰成大字至能號石湖居士吳縣人紹興二十四年進士官至叅知政事事蹟具宋史本傳是書為成大末年所作郡人龔頤膝茂周南相與贊成之時有求于附籍不得者會成大沒乃騰謗謂不出成大手遂寢不行故至元嘉禾志序謂吳郡志以妄議不得刊也紹定初廣德李壽朋始為鋟板趙汝談為之序以周必大所撰成大墓誌定是書實所自為併謂龔頤等三人者嘗為成大蒐訪故謗有自來其論乃定壽朋又以是書止紹興三年其後諸大建置如百萬倉嘉定新邑許浦水軍顧涇移屯皆未及載復令校官汪泰亨補之自謂

仿褚少孫補史記例然當時不別著為續志

故與本書清焉其書凡分三十九門徵引浩博而敘述簡核為地志中之善本刊本久佚此本猶紹定舊槧往往於夾註之中又有夾註考成大以前惟姚宏補註戰國策嘗有此例而不及此書之多亦可云著書之規體矣
乾隆四十四年六月恭校上

總纂官臣紀昀臣陸錫熊臣孫士毅

欽定四庫全書

吳郡志提要

總校官臣陸費墀

吳郡志原序

初石湖范公為吳郡志成守具木欲刻矣時有求附某事于籍而弗得者因譁曰是書非石湖筆也守憚莫敢辦亦弗敢刻遂以書藏學宮愚按風土必志尚矣吳郡自闔廬以霸更千數百年號稱雖數易常為東南大都會當中興其地視漢扶馮人物魁倬井賦蕃溢談者至與杭等蓋益盛矣而舊圖經蕪漫失考朱公長文雖重作亦略是豈非大缺者何幸此筆屬公條章粲然成一

欽定四庫全書

吳郡志序

郡鉅典辭與事稱矣而流俗乃復揜阨使不得行豈不使人甚太息哉紹定初元冬廣德李侯壽朋以尚書郎出守其先度文公嘉言石湖客也是以侯習知之及謁學問故驚曰是書猶未刊耶他日拜石湖祠退從其家求遺書得數種而斯志與焉校學本無少異侯曰噫信是已吾何敢不力而書止紹熙三年其後大建置如百萬倉嘉定新邑許浦水軍顧涇移屯等類皆未載法當補於是會校官汪泰亨與文學士雜議用褚少孫例增

所缺遺訂其脫譌書用大備而不自別為續焉侯喜曰
是不沒公美矣亦吾先人志也書來屬汝談序余病謝
弗果侯重請曰吾以是石湖書也故敢恩子而子亦辭
乎余不得已勉諾客有問余曰或疑是書不盡出石湖
筆子亦信乎余笑曰是固前譚者云也昔八公徒著道
術數萬言書標準淮南通典亦出衆力而特表杜佑自古
如呂氏春秋大小戴禮曷嘗盡出一手哉顧提綱何人
耳余聞石湖在時與郡士龔頤滕茂周南厚三人者博
雅善道古皆州之雋民也故公數咨焉而龔薦所聞於
公尤多異論由是作子盍亦觀益公碑公墓乎載所為
書篇目可攷子不信碑而信誕乎且公蚤以文名四方
位二府余鄙何所繫重余特嘉夫侯之不忘其先能畢
力是書以卒公志而不自表顯焉是其賢非余言莫明
也抑余所感則又有大此者焉方公書始出也疑謗橫
集士至莫敢伸喙以白曾未四十年而向之風波息滅
漸盡至是無一存者書乃竟賴侯以傳是不有時數哉

然則世論是非曷嘗不待久而後定乎此余所以重感
也余誠不足序公姑以是寄意焉其亦可乎否也疑者
唯服侯父子世儒有聞其治吳未替百墜交舉既上此
職方氏將復刊石湖集與白氏長慶集並行而改命漕湖
北矣余故併志以申後覲焉紹定二年十一月朔汴人
趙汝談序

欽定四庫全書

吳郡志卷二

宋 范成大 撰

沿革

吳古揚州之域也初周大王三子大伯仲雍季歷季歷有聖子昌大王欲立季歷以及昌大伯仲雍乃奔荆蠻文身斷髮示不可用以避季歷荆蠻義之從而歸者千餘家號曰句吳立為吳大伯自大伯作吳五世而武王克商即封其後為二曰虞曰吳後十二世當

欽定四庫全書

吳郡志

周惠王二十二年晉獻公滅虞自武王元年至虞滅合四百七十八年又二世合七十一年至壽夢而吳

益興始通中國壽夢卒子諸樊立譙周云又名諸樊過伐楚為

巢門人射傷卒弟餘祭側界反立餘祭卒弟餘昧莫葛反

立餘昧卒子僚立諸樊之子光弑僚自立是為闔廬

破楚伐越越敗吳於檣李又敗之於姑蘇闔廬傷指

而卒子夫差立三年乃伐越以報怨敗之於夫椒棲

句踐於會稽句踐入臣於吳羣臣祖於浙江上句踐

返國厚獻夫差夫差悅之乃賜書增之以封東至句

甬西至檣李南至姑末北至平原縱橫八百餘里舉

今四明三衢嘉興等地悉以與越十四年越遂入吳

十八年又敗吳於笠澤二十一年遂圍吳二十三年

滅吳欲以夫差居甬東夫差自劉越遂并吳而有其

地是時魯哀公之二十二年也句踐卒傳六世至王

無彊凡一百四十餘年楚威王伐越殺無彊盡取吳

故地威王曾孫考烈王以吳封其國相春申君黃歇

欽定四庫全書

吳郡志

使其子為假君留吳秦始皇二十五年并天下以吳

越地為會稽郡治於吳漢因之領縣二十六項羽封

英布為九江王漢改九江曰淮南即以封布十一年

布誅立皇子長為淮南王後封兄子濞為吳王以上

三國盡得揚州之地吳與會稽皆在封域中景帝四

年漢誅乃復為郡治於吳元鼎五年除東越因以其

地并屬於此而立東部都尉後徙章安陽朔元年徙

鄞又徙句章順帝永建四年陽羨周嘉一本作周嘉上書

欽定四庫全書

吳郡志
卷一

三

以縣遠赴會難求得分置遂以浙江西為吳郡領縣十三以東為會稽郡會稽還治山陰按會稽典錄以為是年歲在己巳劉府君上書也孫皓寶鼎元年分吳郡為吳興郡晉吳郡領縣十一宋領縣十二元嘉時以揚州浙江西屬司隸校尉以浙江東五郡立會州及始平王子鸞初封新安王南徐州刺史又割吳郡屬之舊經所謂大明七年廢屬南徐者是也八年屬揚州齊不改陳為吳州隋平陳改曰蘇州以姑蘇山為名大業六年復為吳州領縣五唐武德四年復為蘇州領縣四置都督蘇湖杭暨四州九年罷都督屬潤州貞觀元年隸江南道天寶元年改為吳郡乾元元年復為蘇州置浙江西道都團練觀察使管蘇常潤杭湖睦六州後移使額於潤州而蘇州屬焉乾寧之後屬錢氏吳越國黃巢之亂錢鏐聚兵淮南楊行密據揚州鏐奔渡江據蘇州遂定浙西數州光啓三年六合鎮將徐約攻陷蘇州龍紀元年鏐遣其

欽定四庫全書

吳郡志
卷一

四

弟鉢討約破走之大順元年七月楊行密將李友陷蘇州九月孫儒圍蘇州十一月陷之殺李友二年鏐復平蘇州詔以鏐兼蘇杭等州觀察處置等使乾寧三年楊行密將臺濛陷蘇州五年九月鏐討平之梁開平二年楊行密復圍蘇州三年鏐復討平之唐同光二年升蘇州為中吳軍晉天福五年割嘉興縣為秀州本朝開寶八年改中吳軍為平江軍太平興國三年錢俶納土

以上沿革以吳越春秋史記漢書晉書南史會稽典錄十道四藩志九國

志吳越備史及舊國經等參修

政和三年以徽廟節鎮之所陞蘇州

為平江府

分野

黃帝分星次斗十一度至婺女七度曰須女又曰星紀於辰在丑謂之赤奮若於律為黃鍾

斗建在子今吳越分野

費直分星次斗十度至女五度為星紀於辰在丑吳越分野屬揚州

蔡邕分星次斗六度至須女二度謂之星紀大雪冬至

居之吳越之分野

陳卓范蠡鬼谷張良諸葛亮譙周京房張衡分星次分
壘斗牽牛須女吳越揚州九江入斗一度廬江入斗
六度豫章入斗十度丹陽入斗十六度會稽入斗一
度臨淮入斗四度廣陵入斗八度泗水入女一度六
安入女六度

唐一行所分星次分壘南斗牽牛星紀之次也丑初起

欽定四庫全書

吳郡志
卷一

五

斗九度

餘千四十二
秒十二大

中斗二十四度

一千七百八半終女四

度其分野自廬江九江負淮水之南盡臨淮廣陵至

于東海又逾南河得漢丹陽會稽豫章郡西濱彭蠡

南涉越州盡蒼梧南海古吳越及東南百越之國皆

星紀分也南斗在雲漢下流殷淮海之間為吳分牽

牛去南河浸遠故其分野自豫章東達會稽南逾嶺

徼為越分島夷蠻貊之人聲教之所不洎皆係于狗

國

戶口稅租

舊經所記詳矣前漢領縣二十六故戶至二十二萬口
至一百三萬後漢領城十三戶止十六萬自後領縣
浸減又多兵亂戶口亦耗惟唐天寶元年戶止七萬
口至六十三萬皆有奇然長慶集以為十萬戶此後
來增衍也大唐國要圖云唐朝應管諸院每年兩浙
場收錢六百六十五萬貫蘇州場一百五萬貫觀此
一色足以推見唐時賦入之盛矣本朝戶主二萬七

欽定四庫全書

吳郡志
卷一

六

千八百八十九元豐三年戶十九萬九千口三十七

萬九千皆有奇號為甚盛故其輸帛為足者八萬苗

為斛者三十四萬九千續為兩者二萬五千免役為

緡者八萬五千皆有奇今攷孫觀普明寺記載宣和

間戶至四十三萬中更兵火掃蕩流離城中幾於十

室九空中興為輔郡涵養生息六十年矣淳熙十一

年戶十七萬三千四十二口二十九萬八千四百有

五苗三十四萬三千二百五十六石六斗九升六合

四勺五抄夏稅折帛錢四十三萬九千三百五十六貫四百五十八文上供諸色錢共一百二十三萬一千二百八貫九百文

土貢

唐之士貢攷之唐書所貢絲葛絲綿八蠶絲緋綾布白角簞草席鞵大小香杭柑橘藕鮑皮鮆腊鴨胞肚魚魚子白石脂蛇粟六典又有紅偏巾蛇床子圖經及九域志圖叙唐貢絲綿絲布八蠶絲朱綾等外又有

欽定四庫全書

吳郡志
卷一

七

絲布菱米柑橘藕燈心席燈心草鞋子口味三十七鮑魚條鮆魚條魚春子焉二魚條疑即鮑皮鮆腊春子疑即魚子也大唐國要圖又載蘇州貢絲絹綾絹烏眼綾衫段羅紵布折卑布柑子橘子菱角三書所載不同如此本朝土貢攷之九域圖所貢坐倚席白塼柑橘鹹酸果子海味鱖魚肚糟薑元豐土貢錄載戶部薰橘一萬五千顆

治平四年罷

生絲鞋

皇祐勅罷

花席二

十合

熙寧三年罷

又云進奏院狀稱見今逐年進奉土產

柑橘糟薑鹹酸果子又云今別貢葛二十疋白石脂蛇床子各十斤蓆二十領以上本朝故事今惟遇聖節貢銀五百兩絹五百疋葛布二十疋

欽定四庫全書

吳郡志
卷一

八

吳郡志卷一

欽定四庫全書

吳郡志卷二

宋 范成大 撰

風俗

吳之土風習俗隋志詳矣江南之俗火耕水耨食魚與稻以漁獵為業雖無蓄積之資然而亦無饑餒其俗信鬼神好淫祀父子或異居大抵然也其人並習戰號為天下精兵俗以五月五日為鬪力之戲各料彊弱相敵事類講武宣城毗陵吳郡會稽餘杭東陽其

欽定四庫全書

吳郡志
卷二

俗皆同然數郡川澤沃衍有海陸之饒珍異所聚故商賈並湊其人君子尚禮庸庶淳龐故風俗澄清而道教隆洽亦其風氣所尚也隋志華誼論云吳有發劍之節趙有挾色之客郡國志云吳俗好用劍輕死又六朝時多鬪將戰士按諸說吳俗蓋古如此本朝文教漸摩之久如五月鬪力之戲亦不復有惟所謂尚禮淳龐澄清隆洽之說則自若豈詩所謂美教化移風俗者與

吳趨行樂府題解云古樂府吳趨者行經趨市也文選

注云趨步也此曲吳人歌其土風也吳王闔廬起昌門象閭闔舊說吳人歌其地也晉陸機吳趨行曰楚妃且勿歎齊娥且莫謳四坐並清聽聽我歌吳趨吳趨自有始請從閭門起閭門何戕戕飛閣跨通波重藥承游極回軒啟曲阿鵲鵲慶雲被泠泠鮮風過山澤多藏育土風清且嘉泰伯導仁風仲雍揚其波穆穆延陵子灼灼光諸華王迹頽陽九帝功興四遐大

欽定四庫全書

吳郡志
卷二

皇自富春矯手頓世羅邦彥應興運榮若春林葩屬城咸有士吳邑最為多八族未足侈四姓實名家文德熙淳懿武功侔山河禮讓何濟濟流化自滂沱淑美難窮紀商榷為此歌樂府題解

吳音清樂也乃古之遺音唐初古曲漸缺管絃之曲多訛失與吳音轉遠議者請求吳人使之傳習唐會要

貞觀中有趙師者善琴獨步嘗云吳聲清婉若長江廣流綿綿徐游國士之風今樂府有吳音子世俗之樂耳

白紵舞案舞辭有巾袍之言紵本吳地所出宜是吳

舞也晉俳歌曰皎皎白紵節節為雙吳音呼緒為紵

疑白緒即白紵也

古今樂錄

吳歆吳人歌也

拂舞白符舞白鳬鳩舞按舞志曰江左初有拂舞吳舞

檢其歌非吳辭也又楊泓拂舞序曰自到江南見白

符舞或言曰鳬鳩舞云有此來數十年察其辭旨乃

是吳人患孫皓虐政思屬晉也

欽定四庫全書

吳郡志卷二

三

吳農器甚備以其地平夷盡為田也唐陸龜蒙有耒耜

經今具載之曰農之言也民之習通謂之犁冶金而

為之者曰犁鏡曰犁壁斲木而為之者曰犁底曰墜

鏡曰策額曰犁箭曰犁轆曰犁梢曰犁評去聲曰犁建

曰犁槃木與金凡十有一事耕之土曰墪墪猶塊也

起其墪者鏡也覆其墪者壁也草之生必布于墪不

覆之則無以絕其本根故鏡引而居下壁偃而居上

鏡表上利壁形下圓負鏡者曰底底初實于鏡中工謂

之鼈肉底之次曰墜鏡背有二孔係于墜鏡之兩旁

鏡之次曰策額言其可以扞其壁也皆鼈然相載自

策額達于犁底縱而貫之曰箭前如程而耆者曰轆

後如柄而耆者曰梢轆有越加箭可弛張焉轆之上

又有如槽形亦如箭焉刻為級前高而後庫所以進

退曰評進之則箭下入土也淺以其上下類激射故曰

箭以其淺深類可否故曰評評之上曲而衡之者曰

建建捷也所以柅其轆與評無是則二物躍而出箭

欽定四庫全書

吳郡志卷二

四

不能止橫於轆之前末曰槃言可轉也左右繫以桎

乎輓也轆之後末曰梢中在手所以執耕者也轆車

之胸梢取舟之尾止乎此平鏡長一尺四寸廣六寸

壁廣長皆尺微教果切底長四尺廣四寸評底過墜

鏡二尺策減墜鏡四寸廣狹與底同箭高三尺評尺

有三寸槃增評尺七焉建雄稱絕轆修九尺梢得其

半轆至梢中間掩四尺犁之終始丈有二耕而後有

把去聲渠疎之義也散墪去芟者焉把而有礪呼磳宅

馬有礪礪馬自肥至礪礪皆有齒礪礪觚稜而已咸以木為之堅而重者良江東之田器盡於是

牛欄亦名牛宮吳地下溼冬寒即牛入欄唐人謂之牛

宮陸龜蒙有祝牛宮詞其序曰冬十月耕牛違寒築

宮納而造之建之前日老農請乞靈于土官以從鄉

教予勉之而為辭四牯三牯中一去乳天霜降寒納

此室處老農物物度地不畝東西幾何七舉其武南

北幾何太二加五偶極當間載尺入土太歲在亥餘

欽定四庫全書

吳郡志
卷二

五

不足數上締蓬茅下遠官府耕耨何時飲食得所或

寢或說免風免雨宜爾子孫實我倉庾

魚具吳中水國矢魚之具尤多陸龜蒙皮日休嘗為魚

具詩序其事大凡結繩持網者總謂之網罟網罟之流曰

眾曰罟曰罟

側交反

圓而縱捨曰罩挾而升降曰罟

減女

緡而竿者總謂之罾罾之流曰筒曰車橫川曰梁

承虛曰筍編而沈之曰簞

音

矛而卓之曰矰

音

棘

而中之曰叉鏃而綸之曰射扣而駭之曰棖

以薄板置瓦器

上擊之

置而守之曰神

鯉魚三百六十歲蛟龍輒率而飛去年置一神守之則不

能去矣

列竹於海澨曰滬

吳之滬瀆是也錯薪於水中曰簾

白

所載之舟曰舳舻所貯之器曰筭筭其他或術以

招之或藥而盡之皆出於詩書雜傳及今之聞見可

考而驗不誣又擇其任詠者作十五題以諷其所謂十五

題者曰網曰罩曰罟曰釣筒曰釣車曰魚梁曰叉魚

曰射魚曰鳴棖曰滬曰簾曰種魚曰藥魚曰舳舻曰

筭筭

松陵集

欽定四庫全書

吳郡志
卷二

六

魚斗者吳俗以斗數魚今以二斤半為一斗買賣者多

論斗自唐至今如此皮日休釣侶詩云趁眠無事避

風濤一斗霜鱗換濁醪莫怪兒童呼不得盡行烟雨

漉車螯

吳中賣魚論斗

吳下全盛時衣冠所聚士風篤厚尊事耆老來為守者

多前輩名人亦能因其習俗以成美意舊通衢皆立

表揭為坊名凡士大夫名德在人者所居往往以名

坊曲元叅政絳所居名袞繡坊富祕監嚴所居名德

壽坊蔣密學堂家產芝草名芝草坊范侍御師道所
居名勇冠坊盧龍圖秉奉其親八十餘名德慶坊朱
光祿所居有園池號樂園名樂園坊臨水亭館以待
賓客舟航者亦或因其人相近為名褒德亭以德壽
富氏也旌隱亭以靈芝蔣氏也此風惟吳邦見之

石林

題
集

晉周玘以憂憤謂子總曰害我者諸僮子也吳人謂中
州人曰僮云陸玩食酪得疾與王導戲云僕雖吳人

欽定四庫全書

吳郡志
卷二

幾作僮鬼蓋輕易之詞

吳中自昔號繁盛四郊無曠土隨高下悉為田人無貴
賤往往皆有常產以故俗多奢少儉競節物好遊遨
歲首即會於佛寺謂歲懺士女闐咽殆無行路親友
有經歲不相面者多於此時相見或慶或弔紛然議
姻親覘壻婦亦多決於此時上元彩燈巧麗它郡莫
及有萬眼羅及琉璃球者尤妙天下以糖圓春繭為
節食爆糯穀於釜中名字婁亦曰米花每人自爆以

卜一歲之休咎春時用六柱船紅幕青蓋載簫鼓以

遊虎丘靈巖為最盛處寒食則拜掃墳墓競渡亦用

清明寒食四月八日浮屠浴佛徧走閭里重午以角

黍水糰絲索艾花畫扇相餉夏至復作角黍以祭以

束粽之草繫手足而祝之名健粽云令人健壯又以

李核為囊帶之云療饑七夕有乞巧會令兒女輩悉

預謂之小兒節重九以菊花茱萸嘗新酒食粟粽花

糕十月朔再謁墓且不賀朔是日開爐不問寒燠皆

欽定四庫全書

吳郡志
卷二

熾炭俗重冬至而略歲節臘日併力舂一歲糧藏之

土瓦甕中經歲不蛀壞謂之冬舂米十六日婦女祭

厠姑男子不得至二十四日祭竈女子不得預二十

五日食赤豆粥云辟瘟舉家大小無不及下至婢僕

猫犬皆有之家人有出外者亦貯其分名曰口數粥

是夕爆竹及攤田間燃高炬名照田蠶歲節祭饗用

除夜祭畢則復爆竹焚蒼术及辟瘟丹家人酌酒名

分歲食物有膠牙餚守歲盤夜分祭瘟神易門神桃

符之屬夜向明則持杖擊灰積有祝詞謂之打灰堆
蓋彭蠡廟中如願故事吳中獨傳此一歲風俗之大
略也

吳語謂來為釐本於陸德明貽我來牟棄甲復來皆音
釐德明吳人豈遂以鄉音釋注或自古本有釐音耶
吳謂罷必綴一休字曰罷休史記吳王語孫武曰將
軍罷休蓋亦古有此語

慶厯九老會都官員外郎徐祐與少卿葉參俱以耆德

欽定四庫全書

吳郡志
卷二

九

告老而歸約為九老會晏元獻公杜正獻公皆寄詩
贊之晏詩首句云買得梧宮數畝秋便追黃綺作朋
儔杜詩卒章云如何九老人猶少應許東歸伴醉吟
時會者纔五人故杜詩云爾

九老會後更名耆英又名真率元豐間章岵守郡與郡
之長老遊從各飲酒賦詩時米黻禮部以杭州從事
罷經由為作敘敘諸老之德甚詳十老謂太中大夫
致仕上護軍濮陽縣開國子盧革仲新年八十二奉

議郎致仕騎都尉賜緋魚袋黃挺公操年八十二正

議大夫充集賢殿修撰致仕上柱國廣平郡開國侯

程師孟公闢年七十七朝散大夫致仕上輕車都尉

鄭方平道卿年七十三朝議大夫致仕護軍清豐縣

開國子賜紫金魚袋閭丘孝終公顯年七十三中散

大夫知蘇州軍州事河間縣開國伯護軍賜紫金魚

袋章岵伯望年七十三朝請大夫主管建州武夷山

冲佑觀賜紫金魚袋徐九思公謹年七十三朝議大

欽定四庫全書

吳郡志
卷二

十

夫致仕上柱國彭城縣開國子賜紫金魚袋徐師閔

聖徒年七十二承議郎致仕騎都尉賜緋魚袋崇大

年靜之年七十一龍圖閣直學士正議大夫提舉杭

州洞霄宮清河郡開國侯張詵樞言年七十十人合

七百四十六歲十老各有詩米芾序之

中散大夫河間公清德傑

氣惟時光成高誼勁節縉紳所仰靜鎮吳國四周星紀咸孚惠洽訟庭晨虛迺闕郡齋會九俊老惟內閣

清河公神宇軒拔德章昭融名威兗夷勲書冊府正議大夫廣平公秀實孤映清標邁遠鬱建功利煥于

汗青太中大夫濮陽公冲襟典澈淑質端靖積厚施行父子顯榮朝議大夫清豐公朝議大夫彭城公朝

議大夫徐公朝散大夫鄭公並道韻應曠內德淳耀
或中臺者彥或四方膚使出處有裕終始一德慎梯
利愛布在世間承議郎崇君奉議郎黃君素行潔修
里開標準早解晉綬仕路式瞻威順順碩德天錫難
老貌若遼鶴言為龜鑑於時羽觴屢酬雅章迭作敘
懷感遇樂時休明顧眄之間穆如清徽薰如太和夫
學本美身仕欲行志名節既立榮利後之若諸公積
儲淵深未極經緯而不苟於得進退從容于紀可垂
後生仰止以襄陽米芾港游四海多出賓僚刻繪既
傳屬為序引嗚呼樂道人善君子有之顧散何堪泰
於承命
謹序

淳祐己酉月正人日郡守鄭霖會三學同舍序拜于天

慶齋堂會者四十二人天台鄭霖景說參持志論存心長服膺學

欽定四庫全書

吳郡志
卷二

諭 吳門顏岩世光性節應天滕嘉景初養正天台周公明

元德養正吳門孔煜明仲學觀化吳門盛文韶景聲率履吳

門詹次駢平叟持志吳門滕照德明養正會稽楊珍庭玉

允 三衢滕英傑德秀養正婺女吳遂困仲誠意吳門張經

德常節性過存心服膺習是會稽李士特奇父果行吳門錢振祖

季玉言嘉禾趙與理子正宗學立愛三山趙綰夫景

揚宗學懷德學錄吳門趙震亨子東果行過吳門朱杲晦叔

本務興化陳壽翁仁父篤信過果三山陳夢圓宗震本務

嚴陵諸葛克念師聖循理三山陳桂巖肖持志三山林應

炎光遠召吳門陳伯章煥文誠意吳門呂直之道夫持志

三山陳龍炎剛伯意誠毗陵李熾子明心存吳門范爽邦

景括約守三山鄭宏洪甫率履吳門干天麟仁仲習是合陽

侯燿季立持志通川高仁立仲立立禮吳門陳由之子是

意誠 吳門趙時瑀德玉明賢過懷德通川高仁洽君澤立禮吳

門張應高仰之貫天天台范應時蘇甫習是金華范士表

仲端膺服南劍陳洧有之率履臨安章昌朝文叔德經三山

欽定四庫全書

吳郡志
卷二

陳鈺伯堅養正通川陸應霆伯聲膺服序曰淳祐九年歲

錫宴之後二日三學同舍序拜于吳門天慶觀禮成

錫于郊之春雨堂有執爵而祝者三始酌曰侯自製

錦而恩符節加惠此邦尚矣願守五年之信終始如

一母殷甘棠又酌曰仕而行政義敬共厥職願毋愧焉

羊又酌曰學優則仕仕時當其可願無負乎豐芑於是

合席皆作而謝曰凡我同盟有味斯言是集也序以

齒交以禮會以文隱然鄉飲之遺風依然齊席之舊
習歡然相愛而又規焉古之人飲食必祝歌詩以
見志其庶幾乎又春雨堂即事詩曰十年隨牒訪
三高不覺星上鬢毛尚憶蓬壺形夜夢聊因椒柏
薦春醪文明再會知何日臭味相投屬我
曹絕是虞庠舊培植致君當不愧夔皋
吳郡志卷二

欽定四庫全書

吳郡志卷三

宋 范成大 撰

城郭

太伯城周三里二百步外郭三百餘里在西北隅名曰故吳又曰吳城在今梅里平墟人民皆田其中

闔閭城吳王闔閭自梅里徙都即今郡城始闔閭舉伍子胥於耕野以為行人以客禮事之與謀國政問子胥曰寡人欲強國霸王何由而事濟子胥對曰臣聞

欽定四庫全書

吳郡志
卷三

治國之道安君理民為上闔閭曰其術奈何子胥曰凡欲安君治民興霸成王從近制遠必先立城郭設守備實倉廩治兵庫斯則其術也闔閭曰善夫築城郭立倉庫因地制宜豈有天氣之數以威鄰國者乎子胥曰有闔閭曰寡人委計於子乃使相土嘗水象天法地築大城周迴四十七里陸門八以象天之八風水門八以法地之八卦築小城周十里門之名皆伍子胥所制東而婁匠二門西面閭胥二門南面盤

蛇二門北面齊平二門唐時八門悉啟劉夢得詩云

二八城門開道路許渾詩云共醉八門回畫舸今惟

啟五門八門吳地記所紀而不載封門續經載封門

而謂平門一名巫門與赤門二門皆不在八門之數

蓋考之於今者如此方故吳時東門不開欲以絕越

也梁吳均吳城賦曰古樹荒烟幾百千年云是吳王

所遷東有鑄劍殘水西有舞鶴故屢縈具區之廣澤

宕姑蘇之遠山僕本蓄怒千悲億恨況復荆棘蕭森

欽定四庫全書

吳郡志
卷三

叢羅網蔓亭梧百尺皆歷地而生枝階筠萬丈或至

杪而無葉不見春花夏薰惟聞秋蟬冬蝶水魅晨定

山鬼夜驚不知四海九州乃復有此吳城杜牧吳城詩二月春

風江上來水晶波動碎樓臺吳王宮殿柳含翠蘇小

宅房花正開解舞細腰何處住能歌蛇女逐誰回千

秋萬古無消息國

作荒原人作灰

閭門文選注吳王闔閭立閭門象天閭闔門吳越春秋

曰城立昌門者象天通閭闔風也南史及傳記中或

書作昌門蓋字之訛吳越春秋又曰昌門亦名破楚